



Covid-19 Vaccination tembangba sülen CAA benoktsü: Amit Shah

Myanmar mitkar lenirtem anema longkak aitba tesashiba akumer



VOL. XVIII NO. 120 (ADOK 120) DIMAPUR

KÜPTOKNÜ (SATURDAY)

TSÜKLAI (FEBRUARY) 13, 2021

₹ 5.00

Tanü Karbi Anglong mokdang

Diphu, February 12 (Agencies): February 13, 2021 nü Convening Committee for Unification (CCU)-i ghonda 10 atema Karbi Anglong mokdangtsü ayongzükogo.

Hill Area Development (HAD) department aser Bodoland Territorial Region (BTR) ka kuma lokteptsü ta asüba anema CCU-i iba mokdang ayonger.

Diphu nung aliba Karbi Anglong (DPCK) indang District Press Club nung osangbener den jembidang parnoki February 13 anepdang 5:00 ako nungi nikongdang 3:00 ako tashi mokdangtsüba osang metetdaksü.

Iba sentong nung CCU lennirtem- Saising Rongpi, Kharsing Teron aser Rabindra Rongpi nunger liasü.

"Tenemlen alirtem aser district tem jenjang raksatsütsü atema yimtenren tasa ka atonga lir. Onoki ibaji magizüker aser anema noktaksü" ta CCU lennir

Kharsing Teron-i ashi.

"Assam nung kin telemsa ana lir- ka hills tribe aser ka plains tribe lir. Tenemlen aliba kintem aser lendenlen aliba kintem tsüngda tebendang tulu itta lir" ta Teron-isa metetdaksü.

CCU telok nung president mesüra general secretary shima mali.

HAD aser BTR ka kuma lokteptsüba Indian Constitution of nung 6th Schedule anema lir ta Brihostibarnü Autonomous State Demand Committee (ASDC)-ia metetdaksüogo.

Indian Constitution nung 6th Schedule ji plain area tem asoshi masü saka hill area tem ketdangtsütsü atema lir, ta ASDC-i ashi.

Brihostibarnü chief minister Sarbananda Sonowal menden ser Assam Cabinet senden amending Bodoland aser 6th Schedule Areas Administrative Staff College lapoktsü molunga agizük.

COVID-19 Nagaland: Kma aser Dmr nung dang anepalur

Kohima, February 12 (TYO): Hokolbarnü Nagaland nung nisung 2 dak COVID-19 aliba putet aser külen nisung 13 taneptsü nguogo.

State nung tang nisung 77 anepaludar aser parnok ajak ya Kohima aser Dimapur nungi dang lir.

"Hokolbarnü Nagaland nung nisung 1 ka dak COVID-19 aliba putet aser nisung 13 taneptsü angu" ta Health & Family Welfare Director, Dr Denis Hangsing-i metetdaksü.

"Tanü Kohima nung nisung ka dak COVID-19 aliba putet. Ano, nisung 13 taneptsü angu. Parnokji Kohima nungi 10, Peren nungi 2 aser Dimapur nungi 1 lir" ta paisa ashi.

Nisung 12,176 rongnungi 11,861 taneptsü nguogo, ta Dr Hangsing-isa ashi.

Tanü tashi nung COVID-19 puteta aliba nisung 88 tashi asü. Ajisüaka, tasürtem rongnung parnok 10 bo tanga timtem ajanga asü. Ano, nisung 150 tanga state temi ogo, ta paisa shisem.

Nagaland nung COVID-19 nungi taneptsü angubaji 97.41% lir, ta Dr Hangsing-isa ashi.

District balala nung COVID-19 putetba: Dimapur (6,476), Kohima (3,860), Mon (605), Peren (507), Tuensang (248), Mokokchung (192), Zunheboto (142), Phek (47), Kiphire (41), Wokha (39) aser Longleng (19).

Nisung 12,176 nungi Traced Contacts 5,058, armed forces personnel 4,674, tanga state tem nungi arur 1,871 aser frontline workers 573 lir, ta paisa metetdaksü.

(Maneni tapak 2 nung...)

NBSE-i online ajanga Orientation Programme agitsü

Dimapur, February 12 (TYO): February 18, 2021 anepdang 10:00 ako nung Orientation Programme ka agitsü ta Nagaland Board of School Education (NBSE)-i metetdaksüogo.

Iba sentong ya registered Institutions aser Middle Schools (Government & Private) atema lir aser NBSE portal nung agitsü ta parnokisa ashi.

Iba sentong nung NBSE portal nung forms, question papers aser fee payments uploading aser downloading asüba aser data entry atema NBSE offline software amshibatam sayutsü.

Iba sentong nungsa Class VIII nungi XII tashi online ajanga kaketshirtem indang temetetsü

agitsüba sayutsü. NBSE kübok Class VIII tashi aliba Reju ajak (Middle Schools (Govt. & Private dena) iba Orientation Programme nung adentsüla, ta NBSE-isa metetdaksüogo.

Heads of Registered Institutions-i tesayur ka mesüra office assistant ka NBSE portal nung School ID ketdangtsütsü atema tenüng agitsütsü mepishia metetdaksüogo.

Iba Orientation Programme ya online ajanga agitsü anungji rejutemi internet connectivity aliba desktop computer/laptop amshitsüla. Iba sentong atema ID aser Passcode ji District WhatsApp teloktem ajanga yoktsü, ta NBSE-isa metetdaksüogo.

Nagaland Governor-i yimten latettsü atema merangtsü ayongzük



February 12, 2021 nü 13 buba Nagaland Legislative Assembly indang Session Tenetbuba nung Governor, R.N. Ravi-i o jembiba angur.

Kohima, February 12 (TYO): Centre aser Naga yimten teloktem tsüngda olemtep tembangogo aser tatembang telemetba ka agitsü atema merangtsü nüngdaker, ta Hokolbarnü Governor R.N Ravi-i ashi.

Nagaland Assembly indang Budget session 2021-22 tenzükba anogo nung Governor-i MLA tem den jembiba iba ya metetdaksü.

"Iba onük atema October 15, 2020 nü state sorkari Kohima nung otsüsütsü senden ka ayonga amen. Iba senden nung Kin Hohotem, civil society teloktem, political party tem aser loktiliba nung telok balala adenshia Naga Yimten Tebilemstsü atema jembio. Senden nung adenertemi onük tenet aliba

bangzüng ka agizük aser ibaji Naga Yimten Tebilemstsü atema telemetba ka dang alitsüla ta asüba akangshitep" ta RN Ravi-isa ashi.

December 18 nü Chief Minister Neiphiu Rio aser Leader of Opposition T. R. Zeliang nati külem sangdong ka nung Prime Minister Narendra Modi aser Union Home Minister Amit Shah nati anir India sorkari yimjung olemtep kanga junga inyakba atema tenüngsang agütsü. Tenatisa Naga yimten telok ajak dang putepshiba, temolung lemtep aser angatetteptsü tangatetba nung longjemtsü ayongzuka liasü, ta paisa metetdaksü.

Chief Minister aser Leader of Opposition naprongi maneni

Naga nunger putiotsü balaka aser maitsü nung ajemdaker yimten latetba mapa meranga inyaktsü nangzükogo, ta Governor-isa ashi.

"Nagaland nung law & order tensa junga dang süiogo. Tesem kar nung timtem kar ajuru saka administration aser police-i mapang shitak nung aziökogo" ta paisa ashi.

Dzukou valley nung tawa morok mi lendong atalokdang state, Central agencies aser civil society teloktemi longjemer kanga dang takok ngua mapa inyakogo. Tarutsü nung ibala mesükba lendong majurutsü atema sorkari sentong tajung kar renemdar, ta Governor Ravi-isa ashi.

(Maneni tapak 2 nung...)

Nagaland Assembly budget session tenzükogo

Kohima, February 12 (TYO): Hokolbar nungi tenzükba anogo 9 atema agitsü atema Nagaland Legislative Assembly indang Budget Session 2021-22 tenzükogo.

Tanü MLA tem, Assembly staff, tongti ketdangsurtem, Heads of Departments aser tang support staff ajak COVID-19 tendang. Ano, Assembly secretariat kishizüng nung thermal scanning aser hand-sanitizers yua lir.

Assembly session agidang COVID-19 SOPs sülen anidakba nisungtem amentsü renema lir.

Tanü session tenzükba Nagaland Governor R N Ravi-i o jembiba aser Advisor Namri

Nchang-i Governor onük atema motion of thanks benok aser Advisor H. Haiying-i ibaji nungit.

Senden nungsa Speaker Sharingain Longkumer aser Chief Minister Neiphiu Rio nati anir taoba India Tir Pranab Mukherjee, taoba Union Minister Ram Vilas Paswan, taoba Nagaland Governor Ashwani Kumar, taoba Nagaland Minister CM Chang, taoba Assam Chief Minister Tarun Gogoi, taoba Nagaland MLA Lungbe Meru aser taoba Chief Secretary Temjen Toy nunger asüba asoshi mangyimba osangtem lemsatepba den tetushi agütsü.

Honibar aser Deobar anogotem sodi agiba sülen

Hombar nungi assembly session maneni tenzüksü.

February 15, 2021 nungi question hours tenzüksü aser iba session nungsa annual administrative reports, Government rules, Assembly Committee Reports, Government Bills benoka olemteptsü.

Tang agiba session nung public asoshi kanga rongdak nüngdakba onüktem- Naga yimten tebilemstsü aser power sector revenue indang jembitsü.

Senotsü tsütsü benoka jembiba onüktem rongnung 2020-2021 asoshi supplementary demands for grants adentsü aser CM Rio-i February 18 nü 2021-2022 atema Budget benoktsü.

Gauhati High Court-i NPF MLA 7 anentsütsü onük magizük

Guwahati, February 12 (Agencies): Naga People's Front (NPF)-i Gauhati High Court indang Kohima Bench tsüngdang Nagaland Legislative Assembly nung NPF MLA 7 suspend asütsü atema application ana benok saka magizük.

MLA 7-i parnok disqualify asüba dak sendakba writ petition agütsüba anema ken o benokba atema tatembang oshidang ka magütsü aliba ajanga High Court-i application tem magizük.

MLA temji- E.E. Pangteang, Eshak Konyak, Kejong Chang, B.S. Nganlang Phom, Toyang Chang, N. Thongwang Konyak aser C.L. John nunger lir.

MLA teneti Assembly session nung madentsü atema obendang magütsütettsü kechiyong parnok disqualification asüba indang ken o ano metembang lir ta High Court-i ashi.

Lok Sabha election nung NPF-i Congress candidate K.L. Chishi

pusemtsü lemtetba anema MLA teneti inyakba atema April 2019 nung NPF-i parnok party züngsem nungi züngdoka liasü.

MLA 7-i Nationalist Democratic Progressive Party (NDPP) aser BJP teloktep indang candidate pusema nungit.

July 2020 nung NPF-i parnok anema disqualification petition ka benok saka Nagaland Assembly Speaker Sharingain Longkumer-i ibaji magizük.

Kohima district kübok FLWs 208 nem COVID-19 mozü agütsü



Kohima district kübok IGAR HQ aser 93 BN BSF Chedema nung session sites amenoka alidak Front Line Workers tem COVID-19 mozü agiba mapang tangokba noksa nung angur.

Dimapur, Tsüklai/February 12 (TYO): Kohima district kübok IGAR HQ aser 93 BN BSF Chedema nung session site amenokdak February 12, 2021 nü Front Line Workers (FLWs) 208 nem COVID-19 mozü,

COVISHIELD agütsüogo.

February 11, 2021 nü IGAR HQ, 14 AR Tsiesema aser 78 BN CRPF Sechu nung session site tem amenoka Front Line Worker 297 nem COVID-19 mozü agüja liasü.

Kohima district kübok tang tashinung session sites 43 nungi Front Line Worker aser Health Care Workers 1,018 aser 1,284 nem iba mozü ya agütsüogo, ta sangdong ka ajanga ashi.

District Immunization Officer (DIO) Kohima, Dr. Rupert Peseyie-i ashiba agi, February 13, 2021 anogo 78 BN CRPF, Sechü aser 93 BN BSF Chedema nung mozü agütsüba sentong agitsü.

Block Task Force pur atema COVID Vaccine indang sensitization sentongtem tenzüko aser ano February 13, 2021 nü Anganwadi Workers (AWW) 200 nem iba sentong ayongzüksütsü aser February 17, 2021 nü police unit ajunga aser iba sülen ano Administrative staff aser District Task Force pur nema iba sentong ayongzüksütsü, ta District Immunization Officer ajangasa ashi.

NBSE ajanga orientation sentong atema metetdaksür

Dimapur, Tsüklai/February 12 (TYO): Nagaland Board of School Education ajanga sangdong ka nung ashiba agi, NBSE portal nung Orientation Programme ka February 18, 2021 anepdang 10:00 ako nungi register süa aliba Institution aser Middle School tem (Government aser Private) atema virtual yimya nung ayongzüksü.

NBSE portal amshia forms, question papers, fee agütsüba upload asütsü aser download asütsü atema aser data entry atema NBSE offline software asoshi

rangloker sentong ya agitsü.

Iba sentong nungsa Class VIII nungi Class XII tashi kaketshir indang particulars tem online ajanga agütsütsü asoshia jembitsü.

Iba Orientation Programme nung Class VIII nung enrolment aliba Middle School tem (Government aser Private) densema NBSE kübok register süa aliba Institution ajak nungi mezüdoki adentsüla, ta sangdong ajanga ashi.

Register süa aliba Institution indang tekolakpur dang NBSE portal nung

School ID amshia kaketshir indang particulars, fee payment, question paper download asüba, result upload asüba aser danga office mapa inyakba tesayur mesüra office assistant ka shimteta iba webinar sentong nung shilem agidaksütsü metetdaksü.

Orientation Programme ya virtual mode nung agitsü, anungji reju ajak dang internet aliba desktop computer/laptop amshi tajungba asütsü, ta ashi. Iba senden indang ID aser Passcode ya khen lir District WhatsApp group tem nung agütsütsü, ta sangdong ajangasa ashi.

Nagaland Governor-i yimten latettsü atema... (Tapak 1 nungi...)

Covid wara ajanga rongsenkettsüng tsütsü timtem bentsür aruba aser tangalen mapa inyaker aika meyipa aruba khuretem atema Chief Minister-i anir Strategic Committee for Economic Affairska tentet. Iba sülen mongin nisungtem dena Core Group ka tentetba sülen parnoki Convergence Action Plan ka renemogo, ta paisa metetdaksü.

Sorkari health care, education, youth resources & sports indang facility tajungba kümdaksütsü atema mapa inyaker aser kasa mapang nung lanurtem re-skilling aser mapa ngudaksütsü atema inyaker, ta paisa shisem.

Iba atema Department of Employment, Skill Development & Entrepreneurship-i Nagaland Job Links Portal aser MOBILE SKILL MORUNG lapoktsüogo, ta Ravi-isa ashi.

Maneni, Investment and Development Authority of Nagaland (IDAN)-ia 'Yellow Chain' lapoktsüogo aser iba ajanga shishilembartemi online ajanga mapa inyaksü maongka agütsür.

"Wara ajuruba mapang

Department of School Education-i kaketshirtem timtem mesüdaksütsü atema May 2020 nungi Online Digital Education tenzüka atema tenüngsang agütsür. SoSE-isa Online Students Evaluation Portal, Online School Monitoring System, Teacher's APP aser Teachers' Online Transfer Portal lapoktsüba ajanga state ajungalen teaching-learning maparen inyaka arudar" ta Governor-isa metetdaksü.

Nagaland nung Coal, Limestone, Magnetite, Oil & Natural Gas & Building amala mineral resources aika moaja lir aser iba atema Geology & Mining Department-i National Mineral Resource classification and Reporting system nung aliba ama mapa inyakdar, ta paisa ashi.

"Ozü sorkari Nagaland kübok tangar memenepba tesemtem ajak advanced & developed tesemtem den kasa kümdaksütsü atema tenangzüka agia mapa inyaker. Külen, Tourism Department-i state nung tourism industry asentenshidaksütsü atema sentong aika renemogo" ta

Ravi-isa shisem.

"COVID-19 wara ajanga rongsenkettsüng nung timtem tulu ajuru aser iba ajanga revenue generation aser receipt nung kongshi. Union budget nung Union Taxes & Duties Rs. 4,493.37 crores Nagaland-i lezmüksüba nungi tangbo Rs. 3,151.38 crores shi ka dang asadangteta lir. Iba denji külemi state indang revenue nunga kanga mejungi kongshiogo" ta Governor-isa metetdaksü.

Centre aser State nung revenue akoksaba ajiteta ozü sorkari Non-Development aser Development Outlay kübok senotsü endokba aika 15% pr-rata ajemogo, ta paisa ashi.

Nagaland ste sorkari Centre sorkar den liromedema Dearness Allowance aser Dearness Relief indang mezüing instalment asem sotogo aser nisung tasen meshimoktsü aser gari tasentem malitsü tenokdangba agütsüogo, ta RN Ravi-isa shisem.

"Covid-19 wara ajanga takoksa bentsür aruba nungi kümzüka alitsü aser ano state senotsü tsütsü takoksa kanga melidaksütsü atema item mapa inyak" ta paisa metetdaksü.

Changtongya nung pensioner tem physical verification alitsü

Dimapur, Tsüklai/February 12 (TYO): Sub-Treasury Office Changtongya nungi ita shia pension agizükba pensioner ajak atema Physical Verification of Pensioners maparen 2020-21 asoshi February 25-26, 2021 anogotem inyaksü, ta sangdong ka ajanga metetdaksü.

Anungji iba office nungi ita shia pension agizüker ajak dang nungdakba document bener office-i tsüngtong arutsü metetdaksüogo. Iba

verification nung madenertem nem payment agütsüba ajunga anentsü.

1. Mapang 10.00 AM nungi 4.00 PM.
2. Life pensioners tem 25th February 2021
3. Family pensioners tem 26th February 2021

Temang manemba mesüra tain akumba ajanga tsüngtong maruteter temi Church Office (Pastor) nungi seal dener kuli kaket agütsütsüla, ta sangdong ajangasa ashi.

Zunheboto nung angati Dental Camp ayongzü



Dr. Esther Ngullie, Dental Surgeon, District Hospital, Zunheboto ajanga tebo reprangba mapang tangokba noksa ka yangi angur.

Dimapur, Tsüklai/February 12 (TYO): Indian Dental Association Nagaland State Branch (IDANSB), Zunheboto unit ajanga Community Dental Health (CDH) Programme nung shilem ka ama February 12, 2021 nü District Hospital, Zunheboto nung angati Dental Camp ka ayongzüka liasü.

Dr. Lanuchuba, Medical Superintendent, District Hospital, Zunheboto ajanga iba sentong tenzükdang o tatsüka jembiba mapang dental, oral health aser hygiene indang jembia liasü.

Dr. Esther Ngullie, Dental Surgeon, District Hospital,

Zunheboto ajanga iba camp indang tongmelang agi rateta ashi.

Tebo anepaluba facility alidaki aotsü tasak, talisa yimtsüng aser meta talang nung timtema alir nem angati denture (artificial teeth) agütsütsü nükjidong nung iba camp ya ayongzü, ta lai ashi.

Iba sentong tenzüka Shotomi Baptist Church indang pastor, Kiyelu-i sarasadema liasü.

Iba camp nung nisung 21 tashi tajangzü, balala agia liasü. Camp ya Dr. Esther Ngullie, Dr. Tohito Kinimi, Dr. Loni I Chishi aser Dr. Akaholi Zhimo nungeri anir agia liasü.

Mon nung moko indang awareness sentong agi

Dimapur, Tsüklai/February 12 (TYO): National Tobacco Control Programme (NTPC) kübok District Tobacco Control Cell, Mon ajanga February 11, 2021 nü Deputy Commissioner, Mon indang office nung moko indang awareness sentong ka ayongzüka agia liasü.

Iba sentong nung shisalen sayur ya Nodal Officer NTPC Mon Dr. I. Simon Sumi liasü, shibai moko ajanga nisung

temang nung timtem agütsüba indang onük nung ajemdaker jemb.

Moko ajanga temang nung timtem agütsüba indang video tatsüka iba sentong nung sayu. Iba sentong nung ADC Mon HQ, Rahul Mali, IAS; SDO (Civil) Ilika Zhimomi, NCS; EAC Chubasanen NCS; Dobashis aser Deputy Commissioner, Mon indang office nungi staff tem dena liasü.

COVID-19 Nagaland: Kma aser... (Tapak 1 nungi...)

Tang anepalurtemji Kohima nungi 63 aser Dimapur nungi 13 lir. Parnok rongnung nisung 2 dak terara shirangba yimya lir saka 75 dakbo mali, ta Dr Hangsing-i metetdaksü.

Taneptsü angurtem: Dimapur (6,329), Kohima (3,732), Mon (594), Peren (506), Tuensang (246), Mokokchung (183), Zunheboto (139), Phek (47),

Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,27,722 tendangogo. Itemji RT-PCR ajanga sample 74,293, TrueNat ajanga sample 37,219 aser Rapid Antigen Test ajanga sample 16,210 tendang," ta Dr Hangsing-isa metetdaksü.



TIR YIMYIM YIMOBILEM (EDITORIAL)

DIMAPUR KÜPTOKNÜ, TSÜKLAI (FEBRUARY) 13, 2021

Tsümar züiner, asenok ajemer

Yaküm küm lockdown mapang Nagaland nungi tsümartem aika pei lima bushia aoba agi Nagaland nung tsümartem nütsüing ajema akümtsü aser parnoki inyaka aliba mapatem ajak asenok lisopurtemi inyaksü ta teimla tasen ka temulung nung aita bilema liasü, ajisüaka tang ita ya tom ka atong tashi nung tsümartem to yaküm meyipa aoertem dang nungibo tangang teimba arua asen lima nung mapa ajak parnoki inyak tenzükdagi. Atangji, tanga district-tem nungbo yaküm meyipa aoertem to tanaben meyipa marui alitsüa akok, saka Dimapur nungbo ano tangsa telongsoba küma odagi. Aji oda, Covid-9 wara aruba tajangzük kaji asen lima telonglenbo hopta nung anogo ka tsümartem atuagi kechisarina yoker aluba shishilembaba yimya to anenogo, anungji tangbo tesem aika nung tsümartemi masü saka asen nisungi dang aonsutsü aser jangotsü ayokba angur. Aji oda, joko hopta nung khi asen limai atua ayoktsü atema tsümartem nem bazaar lapoktsüba sentong tobo teti asoshi anenadoktsüla aser asenok ajangzüksü atemabo asenokang tzümaleni lur aseni züsentetba chiyongsü aser yanglutetba osettem parnok dang ayoktsüla. Asenoki asen chirnurem lia aotsü atema tarutsü anogotem indang kodang bilemdangdir, tang amaisa ao nungbo 2100 nungbo Nagaland ya tsümar lima kümadoktsü. Tangbo asenoki Nagaland Legislative Assembly nung tatar menden 60 nungi menden ka parnok tsümartema tatar kümnüra election nung tokteptsü asoshi lapoka agütsür, ajisüaka aji jet ta meyiper, 2100 tashi nungbo Naga nung lisopurtem asoshiang Nagaland Legislative assembly nung reservation nungdaktsü, kechiyong reservation-ji melira tatar menden ajunga nung tsümartem dang adoktsü. Ibaji tang Nagaland nung Naga nung nütsüing ajemba aser tsümar nütsüing züinba tensa tia ya ajanga asadangtetter. Naga nungbo kinungsü kaka dang agir aser tanur-a memesütettsü tsübuba agi ka mesüra ana dang asotsü meranger. Ano, tanü putu nung balaka tia majung kaji, Naga nung kibong aika nung tanur agi memoar, iba jagi Naga nung nütsüing kanga ajema kümdagi. Aji oda, kibong ka nung tanur ka dang sora nisung ana senteper ka dang yanglur, iba jagi Naga nung nütsüing tesarang ka (50%) ajemadoker aser kibong ka nung nisung anati tanur ka meyanglutetra, iba jagibo Naga nung nütsüing kenyongi mali küma tesamalen aotsü tenzüker. Ano, külen Nagaland nung arua alir tsümartem kibalembaba aser nütsüing renlokba ya reprangdangra, tebur karibo tetsür pezü pongo agir aser parnok shia jagi tanur pezü pongo asor, tetezü asenok Naga nung kibong nung tanur kata masodang, tsümar kibong ka nungbo tanur ter metsü asor. Item kibongtemji asen lima shishilembadak chipo - aonpo, anga-an aser entsü, ngashi aser akong, secondhand süoshi, electronic osettem, aben süoshi aser tsüngsem ayokertem lir. Parnokji asen lu aser asen mapa inyakerkem. Aji oda, asen ki mesüzükdang parnok kibong nung tantsüla aser tambusangbo joko mapa inyaksüsa nübo junger mapa nung asem tenzüker. Iba amaji tsümar kibong tasen ka, kinungsü o kinungbo na, nisung ana Nagaland nung lia tenzüka to küm metsü nungbo ishinba agi nisung pongo trok ka kümadoker. Iba amaji Nagaland nung tsümar kibong lakh ka dak tema nung züindagi. Item nung jagi taruba küm 50 tsüngda nisung kwika renlokdir sükdangdi aser shisabolua bilemdi. Iba amaji asen lima nung asen chirnur aser semchirsemnurtem bendanger kübok malitsüsa tanü asenoki, akhi mapang British nungertemi ILP amshitsü tenzüka yutsüba ama, özüng agi bendangertem Nagaland nung aruagi senso küma mezüindaktsüsa tenokdangba ka alitsüla. Ibaji atema tanüa ILP ya kanga akanga amshitsü nungdaker. Iba nungdak metetba agi Manipur nunga ILP amshi tenzükogo aser Meghalaya nunga sashia kangdagi. Iba denji ano tang Nagaland government-i inyaksü asoshi bilema aliba "Register of Indigenous Inhabitants of Nagaland (RIIN)" sentong ya yaktasa mapa küma inyak tenzüksüla. Nagaland nungbo Dimapur nung dena ILP amshitsü asoshi özüngbo lateta lir, saka shingaia hau ta mali aser RIIN ya mapa küma amshitsü latetra, nisung aika Nagaland nung sensobo mesütettsüsa akümtsü, iba jagi aikati anema nokdaker aser iba tashiji Nagaland government nung alirtemi metizüktetter. Ibayongji, tatar senden nung benoka jembir özüng akümtsü asoshi Banuo Z Jamiri aniba luden ka nem teinyakbo mapa kanga bolua inyakdaksüogo, saka tang tashi tagitsü küma latettsü asoshi tatar senden nung onük kümer mebenoktetter. Tetezü, 2100 küm matongdangyong tanüa asenok ya asen mulungba nung masü saka tangari mulungba nungang mulung anitesüingzükba alitsü tenzükogo. Ibaji tarutsü nung, Naga nung lisopurtem atema lendong tulu aketba tamaittsü (sign) tamajung ka Nagaland jara nung zülua sayur asütsü.

OLEMSABANG

Mapang tajung ajak alangzükang kechiyong anogotem tamajung lir

I. Imdang Ozüküm, Er. Rtd.

Efesa 5:16-17 :- Mapang tajung ajak alangzükang, Kechiyong anogotem tamajung lir. Anungji tamashir tesu, saka Kibuba mulung kechi lir, aji angatetang.

Aseni Tajung inyaksü ajurudang meinyaki teyutsü. Mapang tajung alangzükang.

Na tenük Junga lir, Lai züngteter Na tenük mejungi kümerbo lai mezüngtettsü dang mapang tajung lai zügang ken lirbo nai aji züngnutsü saka mezüngtettsü, mapangtajung alangzükang sasatsü,

Na shisatakana? O kanga junga jembiteterna? Iba shisa takaji Tsüngrem atema amshiang O tajung jembitetbaji Asen yanglur San nüker tulutiba yaritsü atema nu o tanangji amshiang, na aser tangar tanüla nung ajangzüksü, mapang tajung alangzükang,

Na tashi tulu na? nu tashi tulu jagi Tsüngrem atema langkabo inyaker as na atema dang inyaker asü? Alima raksatsü nung amshir asü? Nu tashi tuluji kong intoker? Kong amshir? Kunu nu tashi tuluji anentsü, nai kecha meinyaktetba mapang ka arutsü nai sasatsü, tashi tulu dak temulung alemer asü? tashiji shiba nungi aru? Tashi akadang Shibai asen yanglu pilemtetangmano? Anogotem tamajung lir tashi makai akümba anogo arutsü ta aseni meteta dang lir mapang tajung ajak alangzükang.

Na tetsüing tekara kongsa senzür? Nungdak makaba nung senzüba tetsüing masütsü kümdangtini? Kechiyong temulungjangi kongi oang ta ashir ajiagi aotsüsa akümer, saka kodang asen tetsüing yirua tokdir kechasia motettsü, asen sending aika liaka temulung kanga shirangtsü, teinyaksü liaka meinyaktettsü, ajidang masü, tantsür tampur akümtsü, kecha meinyaktsüba mapangji arutsüsa, na aser ni tetsüing tekara alidang tamajung nung amshiba tetsüing masü tajung nung amshiba tetsüing ka asütsü merangtini? Mapang tajung ajak alangzükang, anogoji majung arutsüsa. Mapangtem majung asen teti aki ama dang malitsü, tangar memenebpa mapang arutsü.

Teinyaksü wadang jenti aseni angur aser aseni inyaksü koka dang lir, Tsüngremer wadang, alima wadang Nu wadang, pur medemer wadang, aseni inyakteta lir, Saka odang toktsür asü? Aseni inyaktettsü mapa tajung temjibo inyaka tokang sentsü tsür tesu, Kinük nung aseni mapa tajung ji Teyanglur tsüngdangbo senti lir konang atema masü, tenungsang tagi, Mathi 6:3:-Saka nai angati ajungba mapa inyaktir nu teka tajichi agi kechi inyaker aji nu teka tabelen num temetetdaksü. Oda nai angati ajungbaji temeimdak alitsüsa aser nubui shibai temeimdak nung Pa sasa angur; Pai nu num odia tajangzük agutsütsü.

Nu dang nenok tambur tantsür ajem ajema liang ta ashir asü? Temulung tajung, kechiyong Tsüngrem nükjidong ka na nungi teinyaksü lir, Temeim tantsür tamburtem nenok, asenok melira tashi tait tepur tajung aiyer asangurtemji parnok akümdong mali, lajanuja, den parnoka yamaji akümtsü ta memetet nenok outeted ta jembir, na tantsür arishi talang nai mapa tajung inyakba agi, aser nai Tsüngrem mulung chidaktsüba agi na, chirnur aser semchir asemben tashi ngua aso pezübuba tashi parnok atema temoatsü meshija alitsü asrshir kümdaktsü, tatem tashi nu teinyaksüji ya:- Temeim tantsür tambur, na kodak kikümpang nung lir ta tanüla kümzüker kodaklen repranga alima asoshi sarasadema, chirnur semchir chirnur adema sarasadema, amoa aotsü nu mapa suangma, saka Tsüngrem memetetba tetsütebu kar tia maka taküm alidang sowar kümer chirnur semchisemnur umzükdakja shisapuludakja tamachi maksu o jembia masütsü kanga kümdanga Tsüngrem metetba tantsür tambur suangma

Masü tashi Teyanglur atema sodi mali, Lai shiba nung teshimtet küm kecha Tsüngrem mapa inyaksü shia mali, Mapang tajung alangzüksü ji pei kija mapa, tilatiba nungi tulutiba tashi mapa tajung inyaksü tesongtemba özüng mali, mapang tajung alangzükang, pei tanüla asoshi aser tangar tanüla kümzüksü asoshi sentsü tsür ka teküm

Christiantem suaka mapa tajung inyakba nung nokdang itemji Tsüngrem anemer asütsü, Tsüngrem tenzükertem ta suaka, kar danga tenükmerem, aser telemsa mulungsentsü lira pa Tsüngrem anemer asütsü, Tsüngrem tenzüker suaka, Ni paden tuluba ta pilemra pa ochi anema teyak tesang, Kechiyong Yakob 1:26; Nisung kari temulung kelakokdakja (pei sasa temulung kelakokdalja) pei temeli mazüoki pei sasa temeshi ta pilemra (nu mulung nung na dangar dang temeshi ta pilembaji) iba nisung temeshi yimsu amajok.

Tajung inyaksü tama iba nung ajak sentaka lir, mapang tamajung talangzük. teinyak, tamajung tejembi.

Mapangtajung alangzükba pur tangatetba nung azünger ajak Tsüngremi moajangma Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Philippines nung Arogo kati Covid-19 indang ministry tenzük

Manila, Tsüklai/February 12 (Agencies): Central Philippines nung Catholic Arogo kati Covid-19 indang Ministry ka tenzükogo; coronavirus wara ajanga shi aser shisatsü naprongla nung timtem ajangshirtem iba ministry-i yaritsü.

Biliran province nung aliba Naval Arogoi, February 11, 2021 nü World Day of the Sick anogomong nung Covid-19 Ministry ya tenzük, ta metetdaksü.

Interview ka nung jembidang Naval Arogo nung putir, Rex Ramirez-i, Arogo züngsemtem dang iba project yariba den külemi sorkar ketdangsertem den-a yaritepang ta mepishia metetdaksüogo, ta ashi.

"Ozü Arogoi sentong balala

nung public health agencies den yariteptsü. Shirangertem nem shi tsütsü teyari agütsüba dang masü saka tanela tsütsü nunga yaritsü," ta pai ashi.

Medical nisungtem den online ajanga asüngdangtepa inyaksü atema pai Arogo nung züngsemtemi akümba telok aika tentetogo.

Shirangertem nem counseling agütsütsü aser lenmang nung nemzür tanurtem mesütsü atema telok ka nem mapa lemozüksüogo.

"Nisungtem nem chiyungtsü agütsüba program ya tang tasen ka masü. Iba ya Arogotem nung inyaka arur. Ajisüaka tangbo onoki centralize sür iba maparen inyaksü," ta pai ashi.

Shirangertem anepaluba ya Arogo mission nung kanga

tongtibang shilem ka lir, ta shia putiri Philippines nunger dang shirangertem anepalutsü mepishi.

"Tang nungibo Arogoi mapa tuluba atenzüka inyaksü, iba ya healthcare ministry tenzükba temaitsü lir," ta pai ashi.

Arogoisa züngsemtem dang iba program nung shilem agitsü aser wara anema linük shibangba mapang nungi tenzüka pei kidang dang amonger tantsür-tamburtem yaritsü ajungshi.

January 31, 2021 nü Pope Francis-i, küm shia July ita nung pezübuba Amongnüji 'World Day of Grandparents & Elderly' anogomong asütsü, ta sangdonga Khristantem dang tantsür-tamburtem anepalua yaritsü ayongzüka liasü.

Khristan lanur 10shia nungi 9-ibo climate change atema tebilemstsü akar

February 12, 2021: UK nung tainlonglong Khristan lanur 10 (arrshi küm 14-19) shia nungi 9-ibo climate change atema tebilemstsü akar, ta research tasen ka ajanga bushitetogo.

Khristan lanur 10 shia nungi kati dang climate change tebilemstsü atema Arogoi junga inyakdar ta bilemer, ta kasa survey ajanga bushitet.

'Burning Down the House-How the Church Could Lose Young People Over Climate Inaction' ta ajaba report ya International aid & development agency Tearfund aser Youthscape Centre for Research nati renema liasü.

Iba survey nung British nunger lanur (arrshi küm 14-19 tsüngdapur) 630-i shilem agi.

Iba survey nung shilem agir shilem 84-i, Khristantemi climate change tebilemstsü atema inyaksüji kanga tongtibang, ta langzüa liasü.

Osangbener den jembidang Tearfund nung Youth & Emerging Generation team nung tongti, Dot Tyler-i, climate change onük nung taintemi

lanurtem dang nungi tangazüksü aika lir, ta metetdaksü.

"Asenoki angazüksü tulutibaji tejangraba lir aser ibaji Laishiba ajanga-a ajungshir," ta lai ashi.

"Laishiba ajanga asenok dang meimchirtem meimtsü atema shia lira asenoki climate change atema-a inyaksüla," ta lai ashi.

Kasa survey ajanga, lanur shilem 57-i yaküm climate change atema sarasademogo ta bushitet aser shilem 84-ia iba onük atema sarasademtsü melunga lir, ta bushitet.

Glasgow nung medical student, Rebekah Wilson-i, "Climate change sendokra mesüra iba atema temelung magütsüra asenoki chichiba tebilemstsü atema meinyaker. Climate change ajanga alima nung Tsüngrem chirtem timtemer," ta ashi.

Youthscape Centre for Research Director, Dr Lucie Shuker-i, "Lanurtemi mapa tulu inyaktetbaji Greta Thunberg aser Vanessa Nakate nunger

ajanga asenoki kuli angur. Alima tesem ajaklen lanurtemi climate change atema rongdak süa inyaksü ayimdenner. Tang UK nunga Khristan lanurtemi iba tebilemstsü atema inyaksü jangraba meteter. Iba survey nung shilem agirtemi yamai shiogo- Arogotemi iba ola angashia mapa inyaksüla," ta metetdaksü.

Iba survey ajanga bushitetba nung ajemdaker Tearfund den tanga tentetemi Arogo lenirtem aser züngsemtem atema Climate Emergency Toolkit ka tenzükogo.

Iba toolkit nungji Arogotemi climate emergency sangdonga inyaksü atema tejangja shia lir.

Tearfund nung Global Advocacy & Influencing Director, Dr Ruth Valerio-i, "Iba survey ajanga ya jangjar-lanurtemi Arogotem nem iba ola angashia inyakdaksünner. Yamaji meinyakra Tsüngremi meimba alima raksatsü, anungji asenok dang iba lima kümzüksü ayongzüker," ta metetdaksü.



February 10, 2021 nü Pathein (Myanmar) nung Khristan putirtemi State Counselor, Aung San Suu Kyi noksa amer sepaitemi linük lenirtem apuba anema longkak aitba noksa nung angur.

ANOGO ABEN TSÜNGREM DEN

Tang Agizüksü Mapang Isaiah 61:1-2

Tsüngremer mapangji tabensa! Kodang pai jembir, tashi anga langzüksübaji tang mapang lir. Aiben asenoki alima nung mapang ajak nung Pa dang tashi angatsü mapang lir ama inyaker, saka otsüi asenoki nangzükba inyaksü ataa malir. Tsüngrem den nangzüktepba timtemtsü idakji mapang mali. Asenoki tashi angatsü mesüra mangatsü ibaji dang lir. Ibai tamang mesüra mamangba, tashi angaba, mesüra mangaba tasüngdangba dang lir.

Kodang Tsüngremi tang tagizüksü mapang ta metetdaksüdir, iba sülen nai kechi inyaker aji lendong. Tsüngrem nungi o arudang aikati merenemi atar. Tsüngremi ashir, "Tang nai kü dang langzütsü mapang" aser parnok telangzübaji, "Saka ni renema mali. Ni kü nüngdak kar tama inyaksü. Ni kanga dang mazüng!" ta langzür (Matt. 8:21). Tsüngremer mapangji teti tabensa. Pai na metet, aser Pai ne mapang teti mita alir. Tsüngremi tang tashi ne taküm nung kechisa yanglu metetta lir, aser Pai ne nem kechi agütsü aji teperi ta metetta Pai tajaba agütsür.

Iba yongji Laishibai ashir Tsüngremi ne mulungjang aginer. Asenoki asen temulungjang temeim nung Yisu den meyura, kodang Tsüngremi jembidir asenoki tashi mangaba jagi tangar taküm raksatsütsü. Kodangsa Tsüngremi jembir ibai tatem maka nungi jembir. Pai kechisa asüngdang agakji asenoki metettsü menüngdak. Asenoki metettsübaji "Ibai takoksang Tsüngrem nungi arur" ta metettsüba dang lir. Teti "Tangji" Kibuba dang langzütsüba mapang lir.

Madhya Pradesh nung anti-conversion ozüng kübok nisung 28 puogo

February 12, 2021: India nung anti-conversion ozüng tasenba kübok ita ka tsüngda Khristantem timba ser nisung 28 puogo, ta International Christian Concern ICC) osang ajanga metetdaksü.

January 9, 2021 nü Madhya Pradesh nung sorkari Madhya Pradesh Freedom of Religion Ordinance (anti-conversion ozüng) benoka liasü. Iba mapang nungjagi tenzüka state nung Khristantem anema inyakba kanga bulua kümogo.

Anti-conversion ozüng tasenba kübok apuba nisung 28 rongnung Chhatar Singh Katre densema lir; pa ya Madhya Pradesh nung aliba yimtsüng ka nung school tesayur inyaker. January 27, 2021 nü Katre-i par jala college nung admission agiba nüngtem nung sarasademtsü agitsü atema ayongzüka liasü.

Sarasadem sentong metenzükdang police arua Katre den Khristan ana puer ao. Par asempronglai Hindu nungertem tamangba yimsü meyipdaksütsü merang, ta shia anti-conversion ozüng kübok tai tongloksü.

Khristan asemprongla jail nung lir aser parnoki bail temepishiba agütsübaji Balaghat sessions court-i magizük.

Osangbener den jembidang Katre'er jala, Kalyani Katre-i, "Kübui ni atema sarasadem sentong ayonga liasü; pai kecha aibelena meliaka tang pa jail nung puoka lir. Küm 10 tejaklen tamangba sentong ka nung adenba atema kübu nunger dak azükba agi nisung ka anema ken o benoka liasü. Iba nisungba jagi ken o agütsüba nung ajemdaker police-i kübu den Khristan ana apu," ta metetdaksü.

Madhya Pradesh nung January 9 nü anti-conversion ozüng tasen benokba sülen iba ozüng kübok tang tashi nung nisung 28 puogo. Ken o ajak agi 8 benokogo; ken o pezü Muslim nunger nisung 9 anema benok aser ken o pezü Khristan 19 anema benok.

Madhya Pradesh Freedom of Religion Ordinance (anti-conversion ozüng) kübok tamangba yimsü melenshinertemi anogo 60 jelia district administration nem metetdaksütsüla aser tamangba yimsü melenba ketdangsüa agir yimsü lenirtemia anogo 60 jelia district administration nem metetdaksütsüla. Item ozüng kübok aibelenertem küm 3 nungi küm 5 tashi tepuokdak ayutsü aser senchi 50,000 tashi achitsü akok.

Olong 20 shi nung February 12, 2021 tashi nung iba telangzüba ya onok dangi (e-mail - tiryimym@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzübatemji taruba Honibarnü adoktsütsü.



Kolkata, February 12, 2021: Brihostibarnü Congress party rally agiba mapang nung police-i tashiyim amshiba anema Hokolbarnü Kolkata nung Congress züngsemtemi lenmang nokdanger longkak aitba noksa nung angur.

Aluyimertemi mapang telatet makai longkak aittsü: Rakesh Tikait

Ghaziabad, February 12 (Agencies): Centre sorkar amokmerena Hokolbarnü Bhartiya Kisan Union (BKU) lenir, Rakesh Tikait-i, tang aluyimertemi longkak aitba ya manentsü, aluyimertemi mapang telatet makai longkak aittsü, ta metetdaksü.

"Aluyimertemi longkak aitba ya mapang telatet makai agitsü, kechiyong tang sentong kecha mali. October ita tashi maneni longkak aittsüa akok," ta Tikait-i metetdaksü.

Tamalen-a Tikait-i, Centre sorkari aluyimba ozüing asemprong magien tashi aluyimertemi longkak aittsü, October ita tashi longkak aittsüa akok, ta metetdakja liasü.

Hokolbarnüa Tikait-i, "Aluyimertemi küm shia October 2 nü Ghazipur arrtsü nung longkak aiter. 2018 küm October 2 nü Ghazipur arrtsü nung aluyimertem dak tear gas aser injang khalokja liasü. Küm shia onoki yangi Ghazipur arrtsü nung longkak aiter aser taküma

longkak aittsü," ta metetdaksü. Parliament nung aluyimertem onük nung o lemtepbä dak sendakba nung tasüngdangba ka langzüdang Tikait-i, Parliament nung iba onük benoka o toktepbä atema pelar, ta ashi.

"Linük nung aluyimertemi mapang talangka lenmang nung longkak aiter, anungji iba atemaji kuli karbo alitsü. Aluyimba ozüingtemji aluyimertemi magizükra kechiba itemji agentsü memelunger," ta pai ashi.

Covid-19 Vaccination tembangba sülen CAA benoktsü: Amit Shah

Kolkata, February 12 (Agencies): West Bengal nung Union home minister, Amit Shah-i, India nung Covid-19 vaccination programme tembangba sülen Citizenship Amendment Act (CAA) mapa kuma benoktsü, ta metetdaksü.

Yaküm November ita nunga pai kasa osangji metetdakja liasü.

West Bengal kübok Thakurnagar nung election nüboyim sentong ka nung jembidang Shah-i, "Mamata Banerjee (Bengal Chief Minister)-i onoki nangzükbaji tai ta jembia liasü. Shinga nem-a senso magütsütsü ta lai jembia liasü. Iba maparen memelatsü, ta tangbo lai jembir. Parnoki yazü ajak proker," ta pai ashi.

Bangladesh den arrtsülen aliba Thakurnagar nung ya

Bangladesh nungi aruba Hindu nung refugee aika lir aser Dalit nung refugee-a aika lir.

"Vaccination programme tembangba sülen aser coronavirus wara nungi jenbuba sülen senso agütsütsü, ta ni nangzüker. Onoki jembiba ama onoki inyaker," ta pai ashi.

Matua Dalit nungertemi West Bengal nung assembly election magidangyongi BJP-i aniba nem CAA ozüingtem renemdaktsüner.

Iba jakdang West Bengal food minister, Jyoti Priya Mallick-i, "Shah-i maneni Matuas nung ashioktsütsü meranger. Pai (CAA atema) mapang atakteta magütsü. Vaccination tembangba sülen, ta asüba nungji osang tejangja mali," ta aija liasü.

2019 küm Lok Sabha

election nung Matua nung election aikati BJP yaria liasü, ibayongji Trinamool Congress-i yimsüsüba state nung BJP-i Bongaon aser Ranaghat Lok Sabha menden na nung Trinamool Congress madak takok ngua liasü.

Parliament nung CAA agizükba sülen mapang talangka arudar. CAA ozüingtem renemtsü atema tamasa ita trok lezmükja liasü, iba sülen ita asem meshisem aser maneni ita asem meshizüka April ita tomlen tembangtsü.

West Bengal nung tesüiba küm aika election mapang nung Matua nung aikati Trinamool Congress aser BJP na yaria arudar.

West Bengal state Assembly election taküm April-May nung agitsü.

PM Modi-i China nem India nunger litsü agütsü: Rahul Gandhi

New Delhi, February 12 (Agencies): Hokolbarnü Congress lenir, Rahul Gandhi-i, Ato kilonser ya lapi, pai China anema menokdakteter, ta aitsü.

India-China conference nung jembidang Rahul-i, kechiba China nunger sepaitem Gogra-Hot Springs, Depsang plains nungi mainshir, ta asüngdang.

"Finger 4 ya asen litsü, iba nungji asenok indang post liasü. Tangbo asenok Finger 4 nungi Finger 3-i ainshiogo. Kechiba Ato kilonser Modi-i India nunger litsü China nunger nem agütsü. Iba tasüngdangba ya pa den Defence minister nati langzütsüla," ta Gandhi-i ashi.

"Talisa kanga tongtibang tesem- Depsang plains nungi kechiba China nunger mainshir? Itemji atangji tasüngdangbatem lir. Kechiba parnok Gogra-Hot Springs nungi mainshi?" ta pai asüngdang.

"Linük litsü kümzüka ayutsüji Ato kilonser teinyaktsü mapa lir. Ato kilonseri India nunger litsü China nem agütsüogo," ta pai tai tongloktsü.

Brihostibarnü Parliament nung Union Defence Minister Rajnath Singh-i, India aser China nati anüdoklen Ladakh nung aliba Pangong awatsüing north aser south nungi sepaitem ainshitsü bangjemogo, ta metetdakja liasü.

Rajya Sabha nung Opposition party temi Union Budget aitsü



New Delhi, February 12, 2021: Hokolbarnü Rajya Sabha nung Budget senden amendang Union Minister of State for Finance, Anurag Thakur-i jembiba noksa nung angur.

New Delhi, February 12 (Agencies): Hokolbarnü Rajya Sabha nung opposition party temi, Union Budget 2021-22 ya capitalist tem atema lir, iba budget ajanga takartem ano takarba akümtsü; iba budget nung sensakertem atema kecha mali, ta shia sorkar aitsü.

Ajisüaka BJP-ibo, iba budget nung health sector tajungba akümtsü atema sen lezmüktsüba densema lenla ajak nung sen lezmüktsüogo, ta metetdaksü.

Congress, BSP, AAP aser Left lenirtemi BJP sorkari linük indang osettem aser PSUs nija companies aser industrialists dang yokdoker, ta aitsü.

Congress lenir, Shaktisinh Gohil-i, iba budget ajanga takar capitalist tem yarir saka sorkari sensakertem dang pei sasa taküm alitsü ajungshir, ta ashi.

Paisa, Centre sorkari saru agiba ya state tem nem saru shilem magütsütsü atema lir, ta ashi.

Gohil-i, "Demonetisation aser GST ama telemtetbatem agiba ajanga iba linük ya mapang tamajung ka nung lir. Sorkari takartem yarir aser nungiter saka sensakertem, tashi malirtem aser meshimejungertem dang pei sasa taküm alitsü ajungshir," ta ashi.

Opposition party tem aija BJP lenir aser Union Minister, Anurag Thakur-i, opposition

party temi yimtenren nung tajangzük angutsü atema aluyimertem mamshitsüla; aluyimba ozüing tasen asem ya ajanga aluyimertem income anasü agi timba akümtsü, ta ashi.

Paisa opposition dang, aluyimba ozüing asem nungji Mandis aser MSP malitsü ta shia lir asü?, ta asüngdanga, "Onoki aluyimertem income anasü agi timba akümtsü atema inyaker," ta ashi.

CPI nungi Binoy Biswam-i, "Iba ya 'Atmanirbhar Bharat' asü?, nenoki capitalist nem ajak agütsür. Iba sorkar ya capitalists atema FDI sorkar, ta ashitsü akok. Nisungtem ashioktsütsü memerangtsüla, kechiyong parnoki iba ya angatetogo," ta ashi.

BSP nungi Ashok Siddharth-i, iba budget nung sensakertem atema kecha mali, kechiyong iba ya ajanga linük meyong PSUs ajak ayoktsü meranger, ta ashi.

"Iba sorkari takartem takarba kümdaktsütsü aser sensakertem tesensakba kümdaktsütsü meranger. Sensakertem aser Dalit nunger temedentem industrialists nem agütsütsüji tim masü," ta paisa ashi.

AAP nungi Sanjay Singh-i, sorkari nija companies aser industrialists dang ajak yokdoktsü meranger, ta aitsü.



February 12, 2021 nü Yogeshwar Singh, Anand Kumar Singh, Amlesh Oraon aser Ankit Kumar Singh nunger Baruhatu yimdaki (Jharkhand) meyipa aruba sülen parnoki takok anguba temaitsü sayuba noksa nung angur. Chamoli district nung rürjep anenzüka aluba lendong atalokba sülen parnok samar liasü saka Tapovan project tunnel nungi sepaitemi parnok kümzüka liasü.

Myanmar mitkar lenirtem anema longkak aitba tesashiba akumer

Naypyitaw, Tsüklai/February 12 (Agencies): Mitkar lenirtemi lokti adenshiba nungi pila alitsü ayongzükba mapang linük tesem ajungalen democracy busema longkak aiter aser Hokulbarnüa Myanmar lenir Aung San Suu Kyi busemertemi police den raratepa liasü.

February 1 nü mitkar tashi amshia sorkar atsüngdokba sülen Myanmar nung ketdangsür, activist aser monk tem densema nisung 350 dak tema puogo, ta United Nations human rights office ajanga ashi.

UN rights investigator for Myanmar ajanga Geneva nung Human Rights Council indang senden balaka amendang ashiba agi, international law alema security forces temi longkak aiter dak injang amshiba osang aser noksa amala kuli jenti lir.

Hokulbarnü longkak aitba ya timba rongrong meliasü saka tang tashinung longkak aityonga aruba rongnung tesashitiba alitsü aser sorkar atsüngdoker mitkar lenirtem nem

Washington-i tenokdangba agütsür anogo ka lir ataloker.

Myanmar southeastern tsütsü Mawlamyine yimti nung nisung meyirijang aika adenshia longkak aitba senshidaktsütsü atema police temi rubber bullet agi akhaba mapang nisung asem yiru, ta Myanmar Red Cross ketdangsürtemi osangbener dang ashi.

Radio Free Asia ajanga video sayuba nunga police temi longkak aiter den rara mesüba, nisung ka atsür oa tekolak nung azükba nguogo. Iba sülen police dak long agi aon aser police-ia injang khaloktsü.

"Nisung asem dak injang agi khashi, tetsür ka dak nu menden nung, tebur ka dak tejak nung aser ano tebur ka dak teka nung akha. Saka nütsüing timba akumer," ta Myanmar Red Cross ketdangsür Kyaw Myint-i ashi.

Mongulbarnü linük yimtiba, Naypyitaw nung longkak aitba mapang tetsür ka dak indang agi khashi aser doctor temi la takum kumzüktsü meimlar. La dak

police-i injang khaloktsüba mapang tekolak nung khashia liasü.

Hokulbarnü yimti tulutiba, Yangon nung doctor noklang aika duty mapang asemba coat sentsü temesüing semer golden Shwedagon pagoda leni tetsüing agi jajayonga ao, koba linük nung Buddhist nunger atema temeshitiba tesem ka lir, aser ano jila tesem danga ka nung football saburtemi pei telok indang sübütsü sübur mitkar aija temenünütsü aliba ojangtem placard nung zülua bener jaja.

Linük yimtiba Naypyitaw, tzükum anasa aliba Dawei jila aser northern Kachin state yimtiba, Myitkyina tesemtem nunga longkak aita lanurtemi rap ken atem aser tsüingsanga liasü.

Washington-i tenokdangba agütsüba osang sangdongba mapang European Union nung ozüing yanglurtemia pei linük nungi mera agitsü atema ajungshir aser Britain-ibo mitkar lenirtem merenshitsü atema asadanger, ta shiogo.

Suu Kyi'er National League

for Democracy (NLD) telok busemer temibo US ajanga tenokdangba agütsüba pelashishia agizük saka mera tesashiba agitsü nungdaker, ta ashir.

2007 'Saffron Revolution' sülen tang longkak aitba ya tulu tulutiba alitsü.

Hokulbarnü agi anogo tenet buba tanen makai longkak aita arur alitsü, aser Brehostibarnü Chinese embassy kima nunga NLD busemertem adenshia Beijing-i mitkar lenirtem yariri ta aitsü.

Hokulbarnü mitkar lenirtemi nisung 23,000 dak tema tepuokdak yua aliba nungi chiok aser ibai yimjung, terenlok aser yimya tajung nung democratic linük tasen ka amenoktsü atema mera ka lir aser iba yagi nüburtem peladaktsütsü, ta ashi.

Min Aung Hlaing densema tang aser taoba mitkar lenir ter nem US-i tenokdangba agütsü. Parnokisa gem aser jade company asem tashi blacklist nung inoktsü, koba mitkar

meyong mesüra mitkar kübok lir, ta ashir.

Min Aung Hlaing aser danga mitkar lenirtem ya Rohingya Muslim nungertem reshikangshia amshiba mechi US sanction kübok lir.

US tembar linüktem, tatishitsü agi Japan, Singapore aser India amala nungi ola madok tashi US kisüingi tenokdangba agütsüba ajangabo temelenshi malitsü akok, ta taoba mapang US ambassador to Myanmar inyaka alisang aser tang Washington nung amenoka aliba National Democratic Institute nung tir, Derek Mitchell-i ashi.

Mitkar lenirtemi 2008 constitution nung aliba ama inyaktsü aser election sülen tashi agütsütsü nangzüka lir, saka Democratic Federal Union den putepa constitution tasen ka yanglutsü atema inyaktsü, ta mitkar lenirtemi Hokulbarnü ashi.

Election agitsü atema tang tashi anogo lateta mali.

Taküm Yemen nung tanur 400,000 shi aya agi asütsü akok: UN

Dubai, Tsüklai/February 12 (TYO): Rara aser coronavirus tashidak ajanga chiyongtsü anünga kumdaktsüba atema arrsanga teyari magütsüra taküm Yemen nung arishi küm pongu tekübok tanur 400,000 jungnüa aya agi asütsü, ta UN agency pezüi Hokulbarnü ashi.

Rara adoker küm trok jungnüa lir iba tekümdangtsü ya angashir, kechiaser iba linük nung nütsüing yongsük shilem 80 shi dang linüktem nungi teyari agütsüba nung metaloker alir.

Hokulbarnü report ka sangdongba nung, 2020 den medemdangra Yemen nung arishi küm pongu tekübok sever acute malnutrition agi kangasa anünger shilem 22 tali akumtsü.

Severe acute malnutrition tetetzü chiyongtsü agi anünga ajanga nisung asütsü jenjang kati aruba. Aden, Hodeidah, Taiz aser Sanaa ya tamajungtiba

kungshiba tesemtem lir, ta osang ajanga ashi.

"Ibai Yemen nungi ano teyari meshia ola adokba ka lir, kong chiyongtsü peria manguba tanur shia ya kibong kaka takum alitsü timtemba sayur," ta World Food Program (WFP) Executive Director David Beasley-i Food and Agriculture Organisation(FAO), UNICEF aser World Health Organisation (WHO) den külemi sangdong.

2021 küm ano arishi küm pongu kübok tanur million 2.3 chiyongtsü agi anüngtsü imlar. Yemen nung küm shia tanurtem aser tetsütem chiyongtsü agi anünga ya tali akumer, kong tashidak tali den food insecurity tali akumba ajanga timtem tali arudaktsür.

Taküm mashisa mesüra nubentsüa aliba tetsür million 1.2 shi chiyongtsü agi kanga anüngtsü asadangteta lir.

Yemen nung ayawarabo

sangdonga mali. Saka UN-i alima nung iba linük ya humanitarian crisis tamajungtiba, ta ashir.

Rara den rongsenketsüing ajema akumba aser tashidak wara agi tesem ajunga asünga aser tenla ajemba ajanga tensa tamajungba akumer.

Senotsü teyari peria maliba ajanga Yemen nung million aika ayaba aser tashidak nungi kumzükba nutrition aser danga services tem shibanger.

Iba linük nung humanitarian response atema sen billion \$3.4 nungdakba nungi sen billion \$1.9 dang angu, ta agency temi ashir.

2014 küm tatemlen Houthi movement ajanga linük yimtiba, Sanaa nungi Yemen sorkar atsüngdokba tanaben amenokshitsü atema Saudi-i aniba teloktep sepaitemi Yemen nung 2015 küm March ita tetsüing ajemoka rarayonga arur.

Amazon COVID-19 ya asem-ben agi tamajungba: Brazil

Brasilia, Tsüklai/February 12 (Agencies): Brazilian Amazon nung jangjatetba coronavirus tabu ka ya menatepa aoba tsütsü asem beng agi tamajungba lir saka mozü agi mapa inyaker ta asadangteta lir, ta linük indang health minister-i Brehostibarnü ashi saka kuli tejangjago magütsü.

Iba virus tabu tasenba yagi Manaus yimti nung iba tashidak menatepba wave tanabuba tenzüka lir, aser Health Minister Eduardo Pazuello-i legislator tem dang tawa iba tashidak züina akumba ya meimlai liasü saka aziüoka aor, ta ashi.

Pai Senate hearing ka nung ashiba agi, Brazil nung iba mozü agitsü temsüa alir tesadang ka June ita tashinung mozü ya agütsütsü aser tanünga ya küm tatem tashinung agitsü.

Brazil nung China-i yangluba Sinovac Biotech aser Britain-i yangluba AstraZeneca mozü agütsü tenzüker hopta asem jungogo. Saka Pazuello-i item mozü yagi Manaus nung puteta aliba tashidak den koba tashi mapa inyaker, ibaji mashi.

"Tsüngrem tenüing asanger, iba virus tabu balaka nungya mozü temi mapa junga inyaker ta asadangtetba osang tejangja lir. Saka ibai tali temelaba nung menatepa aor. Ibai asem ben agi tali temelaba nung menatepa aor ta asadangteta lir," ta pai ashi.

Health Ministry ajanga iba tashidak asadangba indang osang kecha agüja mali aser osang tali asüngdangba nunga telangzüba agüja mali.

Sao Paulo nung aliba Butantan Institute kobai Sinovac den lungjemer China nunger mozü ya tendanga yanglu, parnoki sangdong ka

nung Manaus tabu ya asadang tenzükogo saka hopta ana tashi tatem kati maruteti lir.

Rio de Janeiro nung aliba Fiocruz biomedical centre kobai AstraZeneca den lungjemer Oxford University den mozü yanglu, parnoki ashiba agi, Amazon nung aliba virus tabu tasenba anema parnoki mozü yangluba ajanga mapa inyakba asadanger aser Oxford-i sample tem yoker osang atatepba mapang lir.

Amazon arem min nung aliba Manaus nungya coronavirus wave tanabuba agi kanga sashia kongshia emergency service temi metizüki akum.

January ita iba yimti nung aliba mozüki nung oxygen tembang aser nüburtem tangola mesashiteti asütsü aliba nungi kumzüktsü meranga federal sorkari dangalen nungi oxygen supply bener arua liasü.

Tir Jair Bolsonaro dak iba tashidak menaaka pai iba virus süoki ia magizük.

Par administration ya mozü alitsü atema ilonga meinyak ta aitsür, aser ibayongji mozü agütsüba nunga menudaktsür.

Mozü agütsüba nung menuba ajanga Brazil indang nütsüing yongsük million 210 ya lendongi yoker.

Brehostibarnü tashinung coronavirus cases ya Brazil nung million 9.7 dak tema süogo, koba United States sülenbo tanabuba jenjang nung lir, ta Johns Hopkins University ajanga ashir. Iba linük nung mozü agütsüba maparen tenzükogo saka tang tashinung nütsüing yongsük shilem 0.5 dang mozü ya agiogo, ta asadangteter.



Mexico City, Mexico nung aliba Mexico City International Airport nung February 11, 2021 nü COVID-19 yangluba mozü tem indang container agizükba noksa nung angur. Chinese pharmaceutical firm, CanSino Biologics ajanga COVID-19 mozü yangludang amshiba active substance mezüing shipment tayimtsü ajanga Brehostibarnü bener aruogo, ta Mexico Foreign Affairs Ministry ajanga sangdong ka nung ashi.

GOVERNMENT OF NAGALAND

DIRECTORATE OF YOUTH RESOURCES AND SPORTS

NAGALAND: KOHIMA

NO.DYRS-SPORTS-IGS Academy/12/2019/3035

Dated, Kohima the 11th February 2021.

Press release

The selection for admission into IGS Academy, Kohima was held on 9th February 2021 in Wrestling (Boys & Girls), Football (Girls) and Boxing (Boys & Girls) discipline. Therefore, the following under mentioned candidates are hereby declared selected for admission in the IGS Academy, Kohima for the academic session 2021.

Sl.No.	Name of the selected candidates	Waiting list	Contact no. of the concerned coach
1	2	3	4
1.	i) Nüvesu Dawhuo ii) Tingwangsuina iii) Hünüzo Dawhuo iv) Peilungningteibo	i) Webe	Wrestling - 9077406867
2.	i) Sentinaro ii) Khrotsou iii) Nohopi iv) Eyosa		Football - 7830098992
3.	i) Tsengteli ii) Avise Sangtam iii) Thomas Namgi iv) Uzhozo v) Kulunggoyi vi) Joel	i) Nousivituo	Boxing - 8730072220

The selected candidates are hereby directed to contact the concern coaches, failing which their names will be dropped from the selected list without any prior notice. The candidates are required to report along with necessary bedding and sports related kits.

Sd/-
AKUMLA CHUBA, NCS
DIRECTOR

Issued by DIPR

Dimapur District CHILDLINE Advisory Board senden amen



Dimapur, Tsüklai/February 12, 2021 (TYO): Hokolbarnü, DC Conference Hall nung, Dimapur District CHILDLINE Advisory Board senden agiogo, kong Rajesh Soundararajan, IAS Deputy Commissioner Dimapur menden liasü.

Iba senden agiba mapang, 'child friendly colony

campaign', Dimapur nung Hostel tem atema child protection policy tenzüksütsü, District Task Force tawabangba kübok - a y a n g d a k t s ü b a / m a p a inyakdaksüba tanurtem (child labour) kümzüksü, constable level nung police tem atema consultation cum orientation,

media balala den shisadokten senden akatsü aser covid19 test den CHILDLINE ajanga teyuba rongdak maparen nung tongtibang agütsütsü indang jembitepogo. Iba senden nung Department aser Telok tentet balala nungi züngsem 19 denogo, ta sangdong ka ajanga metetdaksü.

Zunheboto DPDB senden agiogo

Zunheboto, Tsüklai/February 12, 2021 (TYO): Brehostibarnü (11.02.2021) Vice Chairman, DPDB aser DC Zunheboto, Peter Lichamo lenisüba kübok, Deputy Commissioner's Conference Hall nung Zunheboto DPDB senden agiogo, ta sangdong ajanga metetdaksü.

DPO (RCH & UIP) Dr M. Nukshisangla Jamir-i District nung tang tagidak aliba COVID-19 vaccination dak sendakba nung telok dang tongmelang agi rasa ashi aser tajangzük angutsüpur 771 nungi health workers 491 nem Covid-19 mozü agütsüogo, ta lai metetdaksü.

Health care workers atema tanabuba vaccine shilem ya February 16 nungi 22, 2021 tashi session tesem ajak nung

agütsütsü, ta lai shilem. Laisa, department tem talisa Revenue, Prison, Police Reserve, Home Guards aser Civil Defence, koba frontline workers kübok aiter item atema sensitization sentong ayongzüksütsü, ta ashi.

Tanabuba vaccination drive shilem, koba February 10 nü 32nd Assam Rifles Battalion nung agiogo, tajangzük angutsüpur 97 nungi nisung 88 nem mozü agütsüogo, ta lai ashi.

Tawa tembangba IPPI aser Indra Dhanush schemes dak sendakba nung lai tongmelang agi telok dang rasa shiogo.

CMO Zunheboto, Dr K. Akaho Sema-i, vaccine agitsü atema nübur dang metetdaksütsü, iba vaccine ajanga teyari agütsüba nung temulung alemtsü aser wara

ano süshia maoba aser social media den sabang balala ajanga Covid-19 vaccine dak sendakba nung mejangjaba osangtem prokba mamangtsü mechi nüburtem saksalema lidaksütsüla ta board ayongzük.

District nung Covid-19 vaccine agütsü tenzüker külen nungi iba mozü agirtem kangshiba mesüra tanga timtem agütsüba osang kecha mali, ta pai metetdaksü.

Kasa senden nung, board-isa PWD, Agri aser teloktep department kübok teinyakdak aliba state aser central project tem, Zunheboto aser Mokokchung districts aser Zunheboto aser Kohima NST bus service tem indang asadanga jembioogo, ta kasa sangdong nung shia lir.

Kanga Pelar

TASOBA :
25-05-1938

TASÜBA :
03-02-2021

P.T Meren (Akhoya)

Wb. P. T Meren (Temjenmeren) 3rd Feb 2021 nü Bethel Medical Center Kohima nung yaria lia iba alima nungi pilaogo. Kija, kibong aser lokti balala kwi kati sarasadem, nübu aser rongsen agi ozü nungita yariogo nenok dang kanga pelaba metetdaksür. Tsüngremi nenok ajak maneni moajangma. Temiem Kinungsü, Tanurtem, Semchirtem aser Kinungertem.

Mulungnen O

*Ni rara tajungji rarago,
Ni alizüng tonga asemogo,
Ni Tamangji yuogo.
- 2 Timoti 4:7*

Onoki kodanga amatsü makokba ojala asür **Temjenjungla** (Merangkong) asüba mapang nung shirnokisa ozü den nübo, shisatsü, rongsen aser sarasadem agi yaritepogo nenok ajak dang kinunger ajaki kanga pelaba iba osang kaket ajanga lemsateper. Tsüngremi nenok mapa tajung asoshi moajangma.

*- Temeim Chirnur,
Semchisemnur & Kinungertem.*

ASO: 27-10-1931
ASU: 04-02-2021

METETDAKTSÜR

Dimapur Changtongya Fellowship Sentep 14th February 2021 Calendar nung 1 PM ta lir saka 3 pm ta melener.
Mapang tensa agi yamai alitsüsa akümer.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **Kabiraj H. Umar Chesam contact no. 7627998690 Address: Near Nagaland GAtE, Lahorijan K/A Assam,** tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM**

Yours sincerely - Ase Sangtam, Dimapur, Burma Camp

India nung Nokia 5.4 saya

New Delhi, Tsüklai/February 12, 2021 (Agencies): Nokia Mobile brand licensee HMD Global-i India shishilembadak Nokia 5.4 smartphone sayaogo, koba Nokia 5.3 den tatongtep smartphone ka alitsü. Smartphone anaprongla tereprangtsü aser specification kasa dang süaka, Nokia 5.4 nung feature tasen kar angutsü.

India nung Nokia 5.4 smartphone ya February 17, 2021 nungi tenzüka Flipkart aser Nokia India website ajanga angutsü.

Design tsütsü reprangdangra, Nokia 5.4 aser Nokia 5.3 design kasa alitsü. Smartphone anaprongla nung tejaklen camera aser tesülen quad camera angutsü. Ajisüaka, Nokia 4.5 panel nungbo waterdrop notch melen hole-punch cutout inoka yanglutsüogo. Nokia 5.4 nung 6.39-inch HD+ display keta lir, koba 19:5:9 aspect ratio alitsü aser slim bezels angutsü.

Nokia 5.4 nung octa-core Qualcomm Snapdragon 662 SoC (Nokia 5.3 nungbo SD 665 SoC) den 6GB RAM aser 128GB storage inoktsüogo, koba microSD card ka ajanga 512GB tashi atsülanga

amshitetsü. Iba smartphone yagi dual-SIM cards (Nano) support asür aser Android 10 out-of-the-box ajanga achaayangtsür. Company-i ashiba agi, küm asem tashi iba smartphone atema ita shia security update aser küm ana software upgrade agütsütsü.

Camera tsütsü reprangdangra, tesülen quad camera nung Zeiss optics lens set up angutsü, kong 48-megapixel primary camera, 5-megapixel ultra-wide camera, 2-megapixel macro camera aser 2-megapixel depth sensor inoka yanglutsüogo. Nokia-i ashiba agi, iba smartphone camera ajanga video tem 60pfs nung tangoktettsü. Smartphone tejaklen hole-punch cutout nung 16-megapixel selfie camera inokja lir.

Nokia smartphone tasenba nung 4,000mAh battery angutsü aser 10W fast charging support asür. HMD Global-i ashiba agi, Nokia 5.4 khi charge nung anogo ana tashi amshiteter (standard usage). India nung Nokia 5.4 - 4GB + 64GB model jenjang sen 13,999 aser 6GB + 64GB variant jenjang sen 15,499 agi angutsü.

Bayern Munich-i Club World Cup kokogo



Al-Rayyan, Tsüklai/February 12, 2021

(Agencies): Brehostibarnü, Qatar nung Bayern Munich-i goal 1-0 agi Mexico indang Tigres club tsükdakja Club World Cup final kokogo. Germany club Bayern Munich atema asaya tanabuba half nung Benjamin Pavard-i goal ka idaktsü. Ita 12 tsüingda Munich-i title trokbuba takok angur alitsü.

Champions League takok angur teloki küm 8 tashi meranga arur, taküm parnoki iba asayamung akoker alitsü. Taoba küm Liverpool F.C-i Club World Cup final takok angu.

2009 küm Barcelona team-i season ka nung title trok takok anguba sülen küm ka tsüingda title trok tashi takok angur club rongnung Bayern Munich tanabuba alitsü.

Hansi Flick'er teloki taoba season nung Champions League, Bundesliga, German Cup, UEFA Super Cup aser German Super Cup takok nguogo.

"Title trok - 'six pack' tashi atonga takok angutsü onoki maongka anguba atema pelar aser iba jenjang ajangzüktetba ya onok atema alakteta tajung lir," ta Bayern striker Robert Lewandowski-i ashi.

Robert teyari ajanga Pavard-i telok atema goal idaktsü.

"Title trok tashi takok anguba ya Football nung ajangzüktetba

rongnung tulutiba alitsü ama ni bilemer. Tanü onoki asayaba ya teti bilemtettsü," ta Robert-i ashi.

2019 November nung Bayern Munich atema coach ama Flick inyaka aruba mapang nungi, European asayamung takok angur teloki asaya pungo nung dang tamakok ngudanga lir.

"Tarutsü nung tamakok majurutsü ni imlaa atar aser tamakok dang nungibo takok timba alitsü," ta Flick-i ashi.

"Title tulu ajangzüktetba yagi team pur telongjem sayur. Team-i iba tashi inyaktetba ya tesümgangtsüka. Team nung shilem agir ajak asaya ngua jangratemer," ta pai ashi.

CONCACAF asayamung takok angur telok ka ama Mexico indang club - Tigres-i teimla tulu yur mezüing Club World Cup final tongteta shilem agiogo. Ajisüaka, tejashitsüka parnoki iba title mengutet.

Iba asaya nung telok kati danga goal meinoktsüteti mezüing half tembang aser tanabuba half tenzüker, Joshua Kimmich ajanga metsüba cross ball ka Lewandowski-i agizüka goal metsüloksü, saka Tigres goalkeeper Nahuel Guzman teka nung ondaker aoba mapang, minute 59buba nung Pavard-i Bayern atema goal inoktsü.

VAR reprangshimba sülen, Bayern indang goal ya agizük.

Mezüing half nunga Kimmich-i goal ka idaktsü, saka Lewandowski offside nung aliba ajanga iba goal magizük.

Iba asayamung final nung, Bayern nungi asayar ana tashi shilem magitettsüsa akümba sülen tena melen asayar ana anioka asayaogo.

Team nungi Thomas Mueller dak coronavirus tashidak putetba sülen final asaya nungi tukadok; kasa mapang defender Jerome Boateng-a nija maparen atema Germany-i meyipa ao. Osang ajanga angazükba agi, Jerome indang taoba tetong ya Berlin nung sür lia angu.

"Thomas tajungba lir aser pa dak iba tashidak temaitsü agi shirangba kecha mali," ta Lewandowski-i ashi.

"Pa (Thomas) dak Covid-19 tashidak putetba ya tejashitsü osang liasü, saka iba tensa mebilemi Thomas atema iba asaya akoktsü temulungtetba nung onoki asaya," ta Lewandowski-i ashi.

Thomas melen Serge Gnabry aniok aser pa den Lucas Hernandez o Niklas Sule nung centre-back tasen ama asaya liasü.

Iba asaya tetenzük nungi Tigres pur azioka liasü aser Kimmich ajanga Bayern pur goal 1-0 agi tejakdang ser asayatsü maongka angu, saka Lewandowski offside tsütsü noktaka aliba ngua iba goal magizük.

Pavard-i Bayern atema goal inoktsüba sülen, Bayern midfielder Corentin Tolisso-i goal tanabuba idaktsütsü merang, saka goal post nung ondak.

Germany tonger sülen, Hombarnü Bundesliga asayamung nung Arminia Bielefeld den masayadang Flick aser team pur anogo ana anisüngzüksü.

Champions' Trophy T-20: Dhansari CC aser Big Shots nati takok angu

Dimapur, Tsüklai/February 12, 2021 (TYO): Hokolbarnü, (12, 02, 2021) Local Ground, Chumukedima Village nung Nagamese Baptist Fellowship (NBF) Sports Ministry ajanga ayongba 1st Champions Trophy T-20 Cricket Tournament pungonübuba nung Chumukedima Town Braveheart Warriors, Dhansari CC aser Big Shots nungeri pei pei tata asaya kokogo.

Mezüing asaya nung, Braveheart Warriors-i run 22 agi United Brothers Club akok. Toss koka Braveheart Warriors-i batting asütsü shim, kong over 14.3 nung wicket 10 out süa run 164 target yutsü. United Brothers-i over 20 nung run 142 dang yanglu aser parnok wicket 7 out süadok. Braveheart Warriors nungi Kundan-i run 72 yangluba atema man of the match award angu.

Tanabuba asaya nung, Dhansari CC-i run 31 agi Old Timers CC akok. Toss koka Dhansari CC-i batting shim, kong parnoki run 171 target yutsü aser wicket 8 out asü. Dhansari-i bowling junga aonba ajanga Old Timers CC nem run 141 dang agütsü aser wicket 8 out sütsü. Arun-i run 39 yangluba atema pa nem man of the match agütsü.

Maneni, kasa anogo asaya tasembuba nung, Big Shots-i run 238 agi 3C XI akok. Big Shots-i toss koka batting asütsü shim aser over 20 nung parnok wicket asem dang out süa run 304 target yutsü. Iba alizüing tongtettsü asoshi 3C XI-i over 20 tashi meranga asaya, saka par teloki run 66 dang yanglutet aser wicket 9 out süadok. Bedise-i run 106 yanglua aser wicket ka agiba atema pa nem man of the match award agütsü.

India vs England: India squad nung T Natarajan asayatsü akok

New Delhi, February 12, 2021 (Agencies): India nunger fast bowler Thangarasu Natarajan, shiba Vijay Hazare Trophy ODI asayamung atema Tamil Nadu squad nung anioka liasü, BCCI ajanga mepishiba sülen, state association-i pa chiokogo.

Taruba ita England aser India na tsüingda limited over series asayamung nung Natarajan-i squad nung külemi asayatsü akok. Ibaji ajanga, aruya aliba ODI series atema BCCI-i pa renemshia lidaktsüner, ta osang ajanga angazük.

"England den aruya aliba series atema BCCI aser Indian team management nati Natarajan renema lidaktsüner. India team asalentong tem

angadanga onoki pa chioktsü mulungtep," ta Tamil Nadu Cricket Association (TNCA) secretary R S Ramasaamy-i ashi.

Tang, züingsem 20 Tamil Nadu squad nung Natarajan melen R S Jaganath Sinivas asayatsü. Vijay Hazare Trophy ODI asayamung atema February 13, 2021 nü Tamil Nadu squad Indore-i aotsü.

Vijay Hazare Trophy ODI tetoktepbay February 20, 2021 nü nungi tenzüksü aser mezüingbo Natarajan ya züingsem 20 Tamil Nadu squad nung dena liasü.

India aser England tsüingda T20 International asaya pungo nungi mezüing asaya March 12, 2021 nü Ahmedabad nung asayatsü. Iba sülen, March 23, 2021 nungi team ana tsüingda Pune nung mezüing ODI asayatsü ternemba lir.

Tamil Nadu chief of selectors S Vasudevan-ia iba maparen dak sendakba nung osang jangjatsüogo aser Vijay Hazare Trophy squad nungi Natarajan chiokogo, ta shiogo.

Natarajan, shibai Australia aser India tsüingda T20 asayaba mapang spinner Varun Chakravarthy yiruba ajanga temelener ama asayaogo, Brisbane nung mezüing Test asayamung nung wicket 3 magidang ODIs aser T20Is nung pai junga asayaogo.

Iba T20Is nung asaya asem nungi Natarajan-i wicket 6 magidang, pai mezüing ODI nung wicket ana agi.

AO-2021: Serena, Garbine aser Sabalenka nunger pezübuba round-i iogo

Melbourne, Tsüklai/February 12, 2021 (Agencies): Hokolbarnü, Australian Open tetsür kija tasembuba round asaya nung Serena Williams aser Spain tsür Garbine Muguruza nati pei pei tata asaya koka pezübuba round-i iogo.

Serena aser Russia tsür Anastasia Potapova na assya mezüing set nung Serena 5-3 agi Anastasia tesülen liasü, saka laisa asaya amokbangteta 7-6(5) agi akok aser tanabuba set nung lai ayong ayonga dang 6-2 agi Anastasia tsükdaktsü. Iba takok densema Serena-i Australian Open asaya 90buba kokogo. Tetsür kija pezübuba round nung Serena aser Belarus tsür Aryna Sabalenka na asayatsü.

Australian Open round pezübuba nung Serena den asayatsüsa Aryna Sabalenka-

i junga asayaogo. Round tasembuba nung Sabalenka-i America tsür Li amokbanga asaya, kong Li indang mezüing service game ana love nung lai akok. Iba den Sabalenka-i serve junga yok aser 'winner' 15 angu.

Tetsür kija asaya nung Grand Slam 23ben takok ngur alila Serena Williams-a mezüing set tiebreaker nung 5-3 agi Anastasia tesülen asaya liasü, saka lai kanga dang toktepa point pezü tashi atonga angu.

WTA ranking nung 101 nung alila aser arishi küm 19 tain Anastasia-i tanabuba set nung kara asaya Serena ajateta asaya, saka arishi küm 39 tain Williams-i junga aziükteta asaya aser 6-2 agi Anastasia tsükdaktsü.

Muguruza, shibai 2020 Australian Open tetsür kija asayamung nung runner-up jenjang angu, lai 6-1, 6-1 agi

Kazakhstan tsür Zarina Diyas tsükdaktsüba sülen, last 16 tongtetogo. Iba asaya nung Muguruza-i break point 5 tashi angu. Melbourne nung iba asayamung tenzüker külen nungi Muguruza-i taoba asaya asem nung game 10 dang mengutet. Taruba round nung lai Naomi Osaka den asayatsü. Tetsür kija round tasembuba asaya tanga ka nung Naomi Osaka-i Tunisia tsür Ons Jabeur madak 6-3, 6-2 agi takok angu.

Terepranger medeni Australian Open maneni asayatsü

Hokolbarnü, Melbourne nung anogo pungo tashi lockdown alitsü tetuyuba agütsü yongjia Australian Open maneni asayatsü, saka item anogo nung terepranger memelatsü, ta ketdangsürtemi ashi.

Taküm indang mezüing

Grand Slam Hombarnü tenzüker, kong asayamung nung shilem agitsüpur ajak quarantine nung amungba sülen, coronavirus dak sendakba nung tenokdangba balala aliba ajanga terepranger tatakzük dang mela asayatem reprangdaktsü.

Melbourne indang airport kübok quarantine hotel nungi coronavirus tashidak putetba osang prokba sülen, iba yimti nung nisung million 5 tashi anogo pungo tashi pei pei kidang alitsü asoshi tetuyuba agütsüogo.

Iba osang sangdongba mapang, Hokolbarnü Australian Open pungonübuba asaya liasü.

BILEMDANGANG

"Karibo sayutsüingi tajung agütsüyonga kiraka dang angateter."